

## Enwau Llefydd gan Angharad Williams

### Ydych chi eisiau datblygu geirfa Cymraeg disgyblion ail-iaith?

Ydych chi wedi ystyried astudio'r ardal leol fel rhan o weithgareddau'r dosbarth, a defnyddio cyfleoedd i ddatblygu eu geirfa ddaearyddol? Isod mae enghreifftiau o sut y gall athrawon blethu eu gwersi ail-iaith â'r cwricwlwm daearyddol. Mae'r rhan fwyaf o'r gweithgareddau hefyd yn addas ar gyfer disgyblion iaith gyntaf.

### Gwaith maes – astudio'r ardal leol

Pan ydych chi allan yn chwilio ac yn sylwi ar nodweddion daearyddol yn eich ardal leol, beth am gael y disgyblion i dynnu llun bras neu ffotograff o'r nodweddion nad dynt yn gwybod y gair Cymraeg amdano?

Gall hyn gynnwys adnabod nodweddion naturiol a rhai dynol.



Eglwys Sant Cynwyl, Cynwyl Gaeo

© Hawlfraint y Goron: Comisiwn Brenhinol Henebion Cymru (CBHC)

Yn dibynnu ar allu ac oedran y plant, gall y nodweddion gynnwys:

- mathau gwahanol o adeiladau e.e. eglwys, ysbyty, rhes o siopau
- tai gwahanol e.e. byngalo, tŷ teras (gweler [rhifyn 33](#) am fwy o syniadau)
- termau daearyddol yn disgrifio'r tirwedd e.e. afon, clogwyn
- defnydd tir e.e. caeau / tir amaethyddol, stad o dai, stad ddiwydiannol

Os nad oes modd cynnwys gwaith maes, gall y disgyblion dynnu llun neu ysgrifennu rhestr (yn Saesneg) o'r cof neu wrth edrych ar luniau o'r ardal.

**Yn ôl yn y dosbarth**, gall y disgyblion ddefnyddio geiriaduron i ddarganfod yr eirfa neu'r term Cymraeg am y nodweddion yn eu lluniau. Yna gellir casglu'r

wybodaeth ynghyd a'i threfnu i greu geiriadur daearyddiaeth – yn ddelfrydol gyda lle i ehangu wrth i'r flwyddyn fynd yn ei blaen.

### **Gweithgareddau ychwanegol**

- Creu 'cardiau snap' i'r disgyblion gyfateb y darlun gyda'r eirfa/term cywir, neu gall y disgyblion greu croesair neu chwilair i'w gilydd.
- Gall disgyblion hŷn nodi symbolau sydd yn cael eu defnyddio ar fapiau i gynrychioli'r nodweddion gwahanol. Er enghraifft, pa symbol sy'n cael ei ddefnyddio ar fap OS i nodi eglwys neu drac rheilffordd?

### **Defnyddio Awyrluniau**

Ffordd hwyliog o ymarfer defnyddio'r eirfa newydd yw drwy labelu awyrlun o'r ardal.

Gall y disgyblion greu labeli ar gardiau ar gyfer labelu awyrlun wedi ei chwyddo'n fawr neu gallant labelu llun bach yr un gyda phensil/beiro.



Bryngaer Pen Dinas, Aberystwyth  
© Hawlfraint y Goron: CBHC

Yn dibynnu ar eich ardal leol, gall y labeli gynnwys nodweddion lleol, megis ffyrdd, rheilffyrdd, chwarel a mathau gwahanol o adeiladau.



Gellir ehangu'r gweithgaredd gyda disgyblion hŷn drwy gymharu'r awyrlun gyda map OS o'r un ardal.

1. Pa wybodaeth ychwanegol y gallwn ei gael o'r awyrlun na allwn ei ganfod o'r map? Enghraifft o hyn fyddai gallu canfod amser y dydd neu'r tymor.
2. Beth am y map – oes gwybodaeth ychwanegol ar gael yma?

Coflein © Hawlfraint y Goron: CBHC

Gellir defnyddio'r awyrlun, yn enwedig os yw'n ddarlun fertigol, fel sylfaen i'r disgyblion lunio eu llinfap eu hunain o'r ardal. Yn dibynnu ar oedran a gallu'r disgybl, mae'n bosibl llunio'r map drwy ddefnyddio amlinelliadau wedi eu labelu neu ddefnyddio symbolau safonol.

Mae'r erthygl uchod yn seiliedig ar weithgareddau datblygu iaith a ddefnyddiwyd yn ystod ymweliad ysgol â'r Comisiwn Brenhinol.

I drefnu ymweliad neu i archebu awyrluniau o Gymru cysylltwch â:  
Cofnod Henebion Cenedlaethol Cymru.  
Plas Crug, Aberystwyth. SY23 1NJ  
Ffôn: 01970 621200 Gwefan: [www.cbhc.gov.uk](http://www.cbhc.gov.uk)



Gwaith Maes :: Rhifyn 34